

天津府志

HARVARD COLLEGE LIBRARY
FROM THE
HARVARD-YENCHING
INSTITUTE
JUL 8 1929

12

Ch L/31³³ 15.1335.83

卷之二十
九至卷之
三十

天津府志卷之二十九

人物志下

武功

晉

石苞 字仲容渤海南皮人雅曠有智局容儀偉

麗不修小節時人爲之語曰石仲容姣無雙縣召

爲吏給農司馬會謁者陽翟郭元信奉使求人爲

御司馬以苞及鄧艾給之行十餘里元信謂二子

曰子後並當至卿相苞曰御隸也何卿相乎既而

又使到鄴販鐵於鄴市市長沛國趙元儒名知人



見苞異之因與結交歎苞遠量當至公輔由是知名見吏部郎許允求為小縣允謂苞曰卿是我輩人當見引在朝廷何欲小縣乎稍遷景帝中護軍司馬歷東萊瑯邪太守所在皆有威惠遷徐州刺史文帝之敗於東關也苞獨軍而還帝指所持節謂苞曰恨不以此授卿以究大事乃遷奮武將軍假節監青州諸軍事諸葛誕舉兵淮南苞統青州諸軍擊破之拜鎮東將軍封東光侯武帝踐祚遷大司馬進封樂陵郡公苞在位忠勤帝每委任泰始八年薨車駕送東掖門外策謚曰武

晉書本傳

劉孟和 名協浮陽饒安人聚眾附高昂兄弟位至

大丞相司馬 北史高季式傳

王 峻 滄州景城人少孤好學祖有方奇之曰是

子當興吾宗長豪曠不樂為衙檢事擢明經第調

清苑尉歷除殿中侍御史景龍末授桂州都督州

有兵舊常仰餉衡永峻始築羅郭罷戍卒埭江開

屯田數千頃以息轉漕百姓賴之開元二年吐蕃

寇臨洮峻自洮水敗之以功加銀青光祿大夫突

厥叛峻將兵以討夜遇雪誓於神止雪及風由東

道追及之獲級三千累遷兵部尚書復為朔方軍

大總管始二張誣魏元忠駿獨上疏申治宋璟曰
 魏公全矣子再觸逆鱗其殆乎駿曰魏公以忠獲
 罪苟得辨雖死弗悔駿卒後信安王禕討奚於幽
 州告捷且言戰時士咸見駿與部將高昭麾兵赴
 敵天子嗟異戶部郎中陽伯成上疏請封駿墓表
 異之優其子孫帝乃遣使祭駿廟進諸子官唐書本傳
 高崇文 字崇文渤海人七世不異居開元中再表
 其閭崇文性樸重寡言少籍平盧軍貞元中從韓
 全義鎮長武城治軍有聲累官金吾將軍吐蕃寇
 寧州崇文率兵往救大破之劉闢反宰相杜黃裳

薦其才統兵討闢八戰皆捷闢追擒之檻送京師

進檢校司空南平郡王卒諡威武子承簡拜澠州

刺史遷刑部吏民立石頌功進檢校尚書左僕射

入拜右金吾大將軍復節度邠寧唐書本傳

按唐書稱崇文其先自渤海徙幽州畿輔通志因
 載人順天府夫既由渤海以徙幽州則河間府志
 列於滄州亦可地
 因人重姑兩存焉

五代

毛 璋 滄州人梁末戴思遠為橫海軍節度使璋

事思遠為軍校晉已下魏博思遠棄滄州出奔璋

以滄州降晉以功為貝州刺史璋為人有膽勇自

晉與梁相拒河上璋累戰有功莊宗滅梁拜璋華州節度使在鎮多不法議者疑其有異志乃徙璋鎮昭義璋初欲拒命其判官邊蔚切諫諭之乃聽命璋累歷藩鎮又在華州得魏王繼岌伐蜀餘貲既富而驕益爲淫侈嘗服赭袍飲酒使其所得蜀妓爲王衍宮中之戲於前明宗聞而惡之召爲金吾上將軍東川董璋上書言璋遣子廷贊持書往西川疑其有姦明宗乃遣人追還廷贊并璋下御史獄廷贊稱實璋假子有叔父在蜀欲往省之而無私書璋無罪名有司議璋前任藩鎮因畜異圖

及處班行不慎行止乃停璋見任官勒還私第初廷贊之蜀與其客趙延祚俱及召下獄延祚多捃璋陰事欲言之璋許延祚重賂以滅口既出而責賂於璋璋不與延祚乃詣臺自言并璋復下獄鞠之無狀中丞呂夢奇議曰璋前經推劾已蒙昭雪而延祚以責賂之故復加織羅乃稍宥璋璋欵上有告者言夢奇受賂而劾獄不盡乃移軍巡獄獄吏希旨鍛鍊其事璋俱伏許賂延祚而未與嘗以馬借夢奇而無受賂璋坐長流儒州已而令所在

賜自盡

五代史本傳

李瓊 滄州饒安人少為騎將與晉高祖俱隸唐

明宗麾下同光二年契丹犯塞明宗出涿州遇契

丹與戰不勝諸將各稍引去而晉高祖獨戰不已

契丹漸合而圍之瓊引高祖衣與俱遯至劉李河

而追兵且及瓊浮水先至南岸高祖至河中流馬

踏瓊以長矛援出之又以所乘馬與高祖而步護

之走十餘里乃得免明宗兵變於魏而南瓊從高

祖以三百騎先趨汴州高祖為保義軍節度使以

為牙隊指揮使高祖建國以為護聖都虞侯賜以

金帛甚厚而不與之官爵瓊亦鬱鬱久之拜相申

一一州刺史出帝時為棣州刺史楊光遠反以書招

瓊瓊拒而不納遷洛州團練使又為護聖右廂都

指揮使晉亡契丹入京師以瓊為威州刺史行至

鄭州遇盜見殺

五代史本傳

宋

劉遇 滄州清池人少魁梧有膂力周祖鎮大名

隸帳下廣順初補控鶴都頭改副指揮使宋初遷

御馬直指指揮使俄領漢州刺史改領眉州累遷控

鶴右廂都指揮使領瓊州團練使從征太原以功

遷虎捷右廂改領蔚州防禦使開寶六年轉侍衛

步軍都虞侯領洮州觀察使征江南領步軍戰擢都指揮使時吳兵三萬屯皖口遇會諸路兵破之擒其將朱令贇王暉等獲戎器數萬金陵以平錄功加領大同軍節度車駕雩祀西洛命率禁衛以從太平興國二年出爲彰信軍節度四年征太原與史珪攻城北面平之進攻范陽師還坐所部失律責授宿州觀察使五年從幸大名復保靜軍節度幽州行營都部署護築保州威虜靜戎平塞長城五城八年徙鎮滑州晨興方對客足有灸瘡痛其醫謂火毒不去則痛不止遇卽解衣取刀割瘡

至骨曰火毒去矣談笑如常時旬餘乃差遇性淳

謹待士有禮尤善射太宗待之甚厚雍熙二年卒

年六十六贈侍中歸葬京師

宋史本傳

張昭遠 字持正滄州無棣人父凝殿前都虞侯寧

州防禦使契丹內寇凝與康保裔伏兵瀛州陷圍

中昭遠年十八挺身掖出之擢左班殿直寄班祇

候每出使還奏利害多稱旨爲忻州都巡檢改閤

門祇候知火山軍管勾河東緣邊安撫司再遷內

殿崇班天禧初閤門副使缺員樞密院方奏議擬

人真宗曰朕有人矣張昭遠知邊略曹儀習朝儀

可並除西上閣門副使俄為河北緣邊安撫副使
 尋知瀛州遷西上閣門使知雄州獻言歲會四權
 場人中銀帝謂輔臣曰先朝置權場所所以通貨非
 所以計貿易之利也會大雨陂塘大溢昭遠勒兵
 築長堤以捍其衝徙鄜延路兵馬鈐轄築堡成平
 川領忠州刺史知成海軍遷四方館使滹沱河決
 壞城郭乃修五關城外環以堤民至今為利擢捧
 日天武四廂都指揮使新州防禦使歷步軍馬軍
 都虞侯嘉州防禦使知代州召還改莫州防禦使
 罷管軍授左龍武軍大將軍昭州防禦使卒特贈

應州觀察使 宋史本傳

元

張榮 清州人後徙鄆陵歲甲戌從金太保明安

降太祖賜虎符授懷遠大將軍元帥左都監乙亥

正月奉旨畧東平益都諸郡戊寅領軍匠從太祖

征西域諸國庚辰八月至西域莫蘭河不能涉太

祖召問濟河之策榮請造舟太祖復問舟卒難成

濟師當在何時榮請以一月為期乃督工匠造船

百艘遂濟河太祖嘉其能而賞其功賜名兀速赤

癸未七月陞鎮國上將軍破水手元帥甲申七月

從征河西乙酉從征關西五路十月攻鳳翔礮傷
右髀帝命賜銀三十錠養病於雲內州庚寅七月
卒年七十三子奴婢襲佩虎符礮水手元帥領諸
色軍匠太祖伐金命由關西小口收附金昌州等
郡乙未金亡戊戌授懷遠大將軍癸卯三月陞輔
國大將軍甲辰二月領蒙古漢軍守均州戊申九
月宋兵襲軍州奴婢拒戰大敗宋師己酉十一月
復與宋兵戰流矢中右臂中統三年卒年七十五
子君佐襲佩虎符礮水手元帥戊戌蔡州五年都元
帥阿木命將礮手兵攻襄陽至元八年朔守襄陽
一字城橐駝嶺攻南門牛角堡破之攻樊城親立
礮摧其角樓樊城破十年襄陽降叅政阿魯海牙
以宋降將呂文煥入朝奉旨召蒙古漢人萬戶凡
二十人陞見各以功受賜帝親諭之令還鎮十一
年從軍下漢江至沙洋丞相伯顏命率礮手軍攻
其北面火礮焚城中民舍幾盡遂破之賜以良馬
金鞍金段又以火礮攻陽邏堡破之十二年從大
軍與宋將孫虎臣戰於丁家洲復從丞相阿木攻
揚州是年冬又從諸軍破常州十三年陞懷遠大
將軍仍礮水手元帥秋君佐屯軍真陽間絕宋糧

道宋制置李庭之都統姜才棄城走揚州平以君
佐為安慶府安撫司軍民達魯花赤十四年春安
慶野人原及司空山天堂賊將攻安慶君佐密察
知之時城中軍僅數百人君佐命搃賊出沒要道
賊不敢入乃寇黃州行省命君佐率眾復黃州因
以為黃州達魯花赤十五年加鎮國上將軍仍繼
水手元帥十九年命率新附漢軍萬人修膠西閘
壩以通漕運二十一年兼海道運糧事是年卒

元史

齊秉節 棣州人父珪提領清池縣事至元四年秉

節襲父職甲寅宋人圍海州秉節往援突陣擒二
將五年從王師圍襄樊初城白河鹿門諸堡宋人
數出兵爭其地公誓麾下曰時方吊伐丈夫當捐
軀立功垂名竹帛不可伊唔牀第空死婦人之手
眾皆諾之每戰擐甲臂鎗為士卒先二十三年分
守饒陽之安仁縣擒劇盜蔡福乙安仁以寧後官
棗陽副萬戶卒子英嗣英亦英武有謀畧不妄殺
降卒時稱父子祖孫仁義將軍

明

甄實 字德輝慶雲人任汝寧府同知歷官陝西

四川布政使時天下甫定人心震驚實興學校勸農桑理冤抑清操自勵整飭戎行適巨寇方張實勦除之民獲奠安遂蒙殊賜居川十六年以平苗功錫劍玉加南京兵部尚書曾葺邑志簡核具有史材

胡欽 字敬夫慶雲人莒州知州璉之子任建安

知縣有劇寇鄧茂七等為亂盤踞竹查山官兵擊之不克欽使人諭賊曰汝等係良民為賊迫至此方今大兵且至悔之無及有能投順請赦仍免役

一年賊聞之咸流涕棄戈投降者五百騎欽請於都御史張偕復為良民賊首大懼復招聚亡命二萬餘圍建安城索欽復讎時有兵部尚書金濂領兵太監王瑾總兵官寧陽侯陳懋等俱困城內莫

敢出敵事急召欽曰賊既索公公當何如欽曰既為臣子焉敢惜死遂乞精兵一千誓與賊戰呼其子灝曰宅內有井爾子母守之勝則父子保全不

勝則急投井死軍士聞之皆流涕欽遂振師出城深入賊隊兵潰散欽率中鼓噪大戰無不以一當

百適都督劉得新領兵卒至兩軍相合懋等率眾亦出三面夾擊斬首數百級茂七中流矢死濂大

喜函茂七首傳檄奏聞恩賜織錦二表裏銀壺金爵陞延平府知府時正統十四年二月也未幾陞陝西叅政與都御史馬中錫共修邊備有功歷任四川山西左布政使卓有清譽歿祀鄉賢

國朝

陳喜 號瀛海慶雲人體貌雄偉倜儻饒幹畧

國初以武生授天津道標中軍遷薊屯營遊擊 豫王出征潼關推喜前鋒奏凱賜戰馬白金以旌其功總鎮孔希貴奏隸本營其時巨寇四面盤據喜胥削平之分守歸德巨寇李化鯨僭號河北時本營兵調征鄖陽化鯨窺河南甚忽喜以我兵雖寡素爲賊所憚斷不敢直攻必潛師上流襲我之後以大衆扼其前乃設伏因半渡水陸夾擊之賊衆遂潰撫軍吳景道題敘其功爲全豫所賴轉涿州叅將數擒劫寇道路獲安經畧洪承疇出師江南題請隨征時賊衆十餘萬攻常德諸將各有汎地喜獨以僻地爲憂嚴陣以待賊果抄道來攻知其有備乃遁敘功以副總兵協鎮金華復被詔勦賊躬擐甲胄晝夜數十戰積勞以卒喜善撫士卒恩威並著自弱冠履行間屢立奇勳卒年四十五子仕

雅授州判

以上慶雲縣志

陳元璐

青縣人授湖廣保慶府通判陞廣西平樂

府清軍同知五省經畧洪承疇嘉其才特委監軍

入山進勦勞瘁成疾卒於軍蔭一子

青縣志

介節

明

崔

琰

青縣人素有氣節洪武時膺薦舉任知縣

累官戶部郎中命領工部檄同平江伯分巡河道

清苦勤慎宣德間賜白金二笏官德九年致仕從

祀鄉賢

河間府志

李

琚

字崇璧鹽山人天性孝友以弟子員充貢

入太學卒業甫期擢工部雲南司主事尋調廣東

司正統甲子冬陞郎中復用薦進階奉議大夫在

官凡卿貳有所商榷若國用之贏縮邊儲之豐耗

與夫兵民之轉輸從中贊之議論允當有裨於國

計者甚多時河間民有部運租稅者以白金若干

遺家僮而道其姓名竟趨去琚走白卿貳召其人

笞而還之生平清介大率類此

分省人物考

汪來

天津人嘉靖辛丑進士授刑部主事陞山

西兵備副使居官嚴毅不避權貴豪姓聞風斂跡

罷官日不妄通竿牘冠蓋到門鍵戶不納日以詩

文自娛 天津衛志

邊維新 字鉉鑑靜海人性耿介有節操中萬曆庚

子舉人授鞏縣知縣庭無冤獄野無追呼鞏人戴

之後擢邠州知州以痼疾予告歸時要人欲致之

為聲援歆以大用不應每謂諸子曰予欲使汝輩

為清白吏子孫冰山安可恃乎以鞏縣封文林郎

崇祀鞏縣名宦 靜海縣志

胡時祥 字季卿慶雲人生而器識不羣讀書每至

達旦文章高邁見者偉之父沒哀毀骨立中萬曆

乙卯舉人欲就一職供菽水會魏瑞亂政母曰尹

母有言吾知汝以善養不知汝以祿養也遂止母

病躬侍湯藥數年如一日疾劇禱於神求以身代

母卒杜門謝客課子弟不事干謁同榜輩居台垣

負重望者欲時祥一面不可得山東張潑稱公典

章老成為第一流人物 慶雲縣志

李昌 興濟縣人任三原縣知縣操持廉介剛正

不阿累陞甘州兵備道副使致仕家居布衣蔬食

處之裕如

國朝

高 位 字抑之鹽山人天啓丁卯科舉人任山西汾陽縣知縣以父艱歸里寬和平易凡公務有益於邑者輒身任之

國朝三舉鄉飲大賓 以上河間府志

楊爾敬 字一字青縣人制行純厚族人恃長侵

爾敬房基者讓之不爭或佃耕爾敬田得銀數百

金匿不使聞佃鄰報知爾敬云彼之福與我何與

耶邑人稱爲長者卒之日異香滿室以子芳春 傳詳

循吏 貴贈奉政大夫河南按察司僉事 青縣志

胡 璜 字宸琮慶雲人教諭時行子性孝友提學

御史以德行獎之任襄陵縣丞署絳州事及解組

貧不能歸襄陵士民資送之至里環堵蕭然絕不

介意學者稱冲德先生 慶雲縣志

鄧 煜 字含黎慶雲人拔貢生性恬退事親備竭

孝養於書無所不讀博聞強記談論古今娓娓不

倦明末兵變掩暴骨數百人晚年施醫藥以南華

自娛值邑人構訟援煜作証不肯向吏遂自盡訃

聞通邑痛惜之子國賓官縣丞 慶雲縣續志

隱逸

國朝

褚士奇 字斗華鹽山人博學宏文性淡定不事聞

達崇禎戊辰恩選入太學順治乙酉部催就仕曰

二親老矣恐報劉之日短也辭之甲午銓授通判

復堅辭不就 鹽山縣續志

邵汝德 字雙彌鹽山人廩生家貧力學善詩古文

辭

國初太學俱破格選用

詔天下學臣舉諸生文行兼優者充國雍學使曹溶首

辟汝德辭不赴子冲 傳詳文苑 成進士益自恬退閉戶

著書士林重之 鹽山縣志

劉 佚 字無逸號遜之晚年名夢號患骨滄州人

明末諸生隱居不仕妻亡不再娶有二女通翰墨

亦早卒惟有一僕菜羹粗糲晏如也博覽經史及

宋儒諸書書法瘦硬畫山水以草勢成之書篆隸

尤工草篆愛摹刻古印詩蒼涼悲惋有騷雅遺風

順治甲午夏佚臥病有數卒排闥入辱之遂自縊

所著有三教合宗證明了竟篆中隸宜五車韻瑞

補昨非今妄集若干卷惟刪正資治通鑑未卒業

王家基 滄州人明萬 戊午解元魏忠賢擅政欲

招致門下啖以利家基正色拒之試禮闈忠賢傳

意相招又力拒之自是隱約食貧終身不試

國朝定鼎退而耕日家基幸際太平得稱逸老足矣別

業在城南新縣鎮北人呼之曰解元莊以上鹽山縣續志

藝術

前漢

趙定 渤海人宣帝時丞相魏相奏雅琴趙氏七

篇召見待詔前漢書藝文志

北魏

郝文法 渤海人嘗從清河崔彧學醫遂有大名入

醫鑑滄州志

北齊

吳遵世 字季緒渤海人少學易入恒山從隱居道

士遊處數年忽見一老翁謂之云授君開心符遵

世跪取吞之遂明占候後出遊京洛以易筮知名

魏武帝之將卽位也使遵世筮之遇明夷之賁曰

初登於天後入於地帝曰何謂也遵世曰初登於

天當作天子後入於地不得久也終如其言世祖

以丞相在京師居守自致猜疑甚懷憂懼謀將起

兵每宿著令遵世筮之遵世云不須起動自有大

慶俄而趙郡王奉太后令以遺詔追世祖及卽祚

授其中書舍人固辭以疾

北齊書本傳

王 早 渤海南皮人也明陰陽九宮及兵法善風

角明元時喪亂之後有人詣早求問勝術早爲設
法令各無咎由是州里稱之時有東莞鄭氏執得
讎人趙氏剋明晨會宗族當就墓所刑之趙氏求
救於早早爲占候并授以一符曰君今且還選取
七人令一人爲行主者佩此符於鷄鳴時伏在讎
家宅東南二里平巨當有十人相隨向西北行中
有二人乘黑牛一黑牛最在前一黑牛應第七但
捉取第七者將還事必無他趙氏從之果如其言

乃是鄭氏男五父也諸子並爲其族所宗敬故和

解二家趙氏竟免後早與客清晨立於門內遇有

卒風振樹早語客曰依法當有千里外急使日中

時有兩匹馬一白一赤從西南來至卽取我逼我

不聽與妻子別語詭便入召家人隣里辭別仍沐

浴帶書囊日中出門候使如期果有馬一白一赤

從州而至卽促早上馬遂詣行宮時太武圍涼州

未拔故許彥薦之早彥師也及至詔問何時當剋

此城早對曰陛下但移據西北角三日內必剋帝

從之如期而剋輿駕還都久不雨帝問早早曰今

日申時必大雨比至未猶無片雲帝詔早詰之早
 曰願更少時至申時雲四合遂大雨滂沱早苦以
 疾辭乞歸鄉里詔許之遂終於家或言許彥以其
 術勝恐妨已譎令歸之耳

北史本傳

顏惡頭 章武郡人也妙於易筮遊州市觀卜有婦
 人負囊粟來卜歷七人皆不中而強索其粟惡頭
 尤之卜者曰君若能中何不為卜惡頭因筮之曰
 登高臨下水洄洄唯聞人聲不見形婦人曰姪身
 已七月矣向井上汲水忽聞胎聲故卜惡頭曰吉
 十月三十日有一男子詣卜者乃驚服曰是顏生

邪相與具羊酒謝焉有人以三月十三日詣惡頭
 求卜遇兌之履惡頭占曰君卜父父已亡當上天
 聞哭聲忽復蘇而有言其人曰父臥疾三年矣昨
 日鷄鳴時氣盡舉家大哭父忽驚寤云我死有三
 天人來迎欲升天聞哭聲遂墜地惡頭曰更三日
 當永去果如言人問其故惡頭曰兌上天下土是
 今日庚辛本宮火故知卜父今三月土入墓又見
 宗廟爻發故知死變見生氣故知蘇兌為口主音
 聲故知哭兌變為乾乾天也故升天兌為言故父
 言故知有言未化入戌為土三月土墓戌又是本

宮鬼墓未後三日至戊故知三日後死惡頭又語
 人曰長樂王其年某月某日當為天子有人姓張
 聞其言數以寶物獻之豫乞東益州刺史及期果
 為天子擢張用之惡頭自言厄在彭城後遊東都
 逢彭城王尔朱仲遠將伐齊神武於鄴召惡頭令
 筮惡頭野生不知避忌高聲言大惡仲遠怒其沮

眾斬之 北史本傳

唐

邢和璞 善知人天壽開元時有張果自言生堯丙
 子歲帝使和璞推之懵然莫知其端和璞喜黃老

作潁陽書世稱之 唐書張果傳

按和璞附見新唐書張果傳不言何地人河間府志稱其隱於瀛海間仍之

何滿 滄州人白樂天云開元中何滿犯罪繫獄
 中撰曲曰河滿子鞠獄者憫之為之奏明皇不許

竟坐 唐詩紀事

宋

劉翰 滄州臨津人世習醫業初攝護國軍節度
 巡官周顯德初詣闕獻經用方書三十卷論候十
 卷今體治冊集二十卷世宗嘉之命為翰林醫官
 其書付史館再加衛尉寺主簿太祖北征命翰從

行建隆初加朝散大夫鴻臚寺丞時太祖求治事皆覈實故方技之士必精練乾德初令太常寺考較翰林醫官藝術以翰爲優絀其業不精者二十人自後又詔諸州訪醫術優長者籍其名仍量賜裝錢所在厨傳給食遣詣闕開寶五年太宗在藩邸有疾命翰與馬志視之及愈轉尚藥奉御賜銀器緡錢鞍勒馬嘗被詔詳定唐本草翰與道士馬志醫官翟照張素吳復珪王光祐陳昭遇同議凡神農本經三百六十種名醫錄一百八十種唐本先附一百一十四種有名無用一百九十四種

翰又叅定新附一百三十三種旣成詔翰林學士中書舍人李昉戶部員外郎知制誥王祐左司員外郎知制誥扈蒙詳覆畢上之翰後加檢校工部員外郎太平興國四年命爲翰林醫官使再加檢校戶部郎中雍熙二年滑州劉遇疾詔翰馳往視之翰還言遇必瘳旣而卽死坐責受和州團練副使端拱初起爲尚藥奉御淳化元年復爲醫官使卒年七十二

宋史本傳

許希 渤海人仁宗疾諸醫俱劣冀國太長公主薦希診脉宜心下用鍼方愈左右俱以爲不可諸

黃門祈以身試之無害遂鍼之帝愈命為翰林醫官賜緋衣銀魚及器幣希拜謝已又向西拜帝問其故對曰扁鵲臣師也請以賜金裝廟帝遂成廟於鄭野封靈應候希著神應鍼經要訣仕至殿中省尚藥奉御

明

任 資 一名毅字致遠滄州庠生太醫院奏允考選醫士資得入焉以醫功累進院判進藥屢効加常通政司右通政尋陞左資工於難經本草常語人曰他日不為良相必為良醫果實其言

以上滄州志

國朝

獅道人 張氏滄州人精於易以易拆字言無不中

袁繩武 滄州人以歲餒游四方遇異人授以書二

冊繩武挾其術走京師一時決疑問難無不曲中喜發人隱事令其畏而悛改遇貧者解囊贈之或云某地有藏某親友可貸其人如其言求之無不驗有某就繩武問休咎繩武不應甫出戶即厲聲曰因一婢而乖伉儷之好尚可與言耶坐中無不

悚然

寓賢

周

呂

尚 齊太公望也佐武王克殷成鷹揚之功封於齊當困棘津時嘗釣於南皮城西十里今臺尚

存 南皮縣志

按靜海縣志亦稱縣南三十里有太公望釣臺其地有子牙里子牙河在焉相傳太公會釣魚於此夫太公之字子牙已無可據復因子牙里與河之名而附會釣臺益覺其說之不經矣世邈難稽姑存其說

後漢

范

冉

字史雲陳留外黃人少慕梁伯鸞閔仲叔

時以冉為萊蕪長遭母憂不到官後

辟太尉府以狷急不能從俗嘗佩犢於朝議者欲

以為侍御史因遁身逃命於梁沛之間徒行敝服

賣卜於市遭黨人禁錮遂推鹿車載妻子拮拾自

資或寓息客廬或依宿樹蔭如此十餘年乃結草

廬居焉

南皮縣志謂在古南皮之西

所止卑陋有時絕粒窮居

自若言貌無改閭里歌之曰甑中生塵范史雲釜

中生魚范萊蕪黨禁解為三府所辟乃應司空命

中平二年卒年七十四諡曰貞節先生

後漢書本傳

按冉寓息皮城史無明文且云逃命梁沛之間則益非河間之地可知舊志相沿已久姑存之又後漢書注冉或作丹

三國魏

吳 質

字季重濟陰人以文才與建安諸子並馳

名當世寄居南皮文帝雅愛敬之嘗偕阮瑀輩過

訪日相歡洽後與質書云憶昔南皮之遊誠不可

忘浮甘瓜於清泉沉朱李於寒冰節同時異物是

人非我勞如何

河間府志

按裴松之三國志注謂魏文帝即位又有與質書云南皮之遊存者三人烈祖龍飛或將或侯今惟吾子棲遲下仕三人者謂曹真曹休前與質等俱在勃海游處也真休二人舊志失載因附錄之

王 修

字叔治北海營陵人年七歲喪母母以社

日亡來歲鄰里社修感念母哀甚鄰里聞之為之

罷社初平中孔融召為主簿守高密令頃之郡中

有反者修聞融有難夜往奔融賊初發融謂左右

曰能冒難來惟王修耳言終而修至袁譚在青州

辟修為治中從事譚攻兄尚修諫曰兄弟還相攻

擊是敗亡之道也譚不聽太祖破南皮閱修家穀

不滿十斛有書數百卷太祖歎曰士不妄有名乃

禮辟為司空掾遷魏郡太守魏國既建為大司農

郎中令

三國志本傳

南北朝

崔 暹

字季倫少為書生避地勃海依高乾乾以

妹妻其弟慎後暹為尚書僕射北史本傳

唐

王勃 字子安絳州人唐高宗時六歲能文詞章

蓋世年十三侍父宦遊江左舟次馬當山登岸步

見大門當道榜曰中元水府之殿迨回歸路遇老

叟坐於磯上與勃長揖曰子非王勃乎勃心驚異

叟曰來日重九南昌都督命客作滕王閣序子有

清才盍往賦之勃曰此去南昌七百餘里今已九

月八日矣夫復何言叟曰子誠往吾助清風一夕

勃欣然拜謝問叟仙耶人耶叟笑曰吾中元水府

君也勃即登舟翌日昧爽已抵南昌會府帥閻公

會僚屬於滕王閣授簡及勃勃輒受為序頃而成

文大悅謝以五百緡勃舟回故地而叟已先坐石

磯矣勃拜謝曰當具菲禮以答神庥叟笑曰但過

長蘆焚陰錢十萬吾有未償薄債也勃後過長蘆

如數焚之而去河間府志

蕭穎士 字茂挺四歲善屬文十歲補太學生觀書

一覽即誦通百家譜系書籀學開元中舉進士天

寶初補秘書正字于時裴耀卿等皆先進器其材

與鈞禮由是名播天下尹徵王衡等皆執弟子禮

以次授業時號肅夫子嘗遊南皮清明泛舟有序
存焉後客死汝南門人諡曰文元先生

唐書本傳

陽城 字亢宗定州北平人徙陝州夏縣世為官

族資好學貧不能得書求為吏隸集賢院竊院書

讀之晝夜不出戶六年無所不通及進士第乃隱

中條山遠近慕其行來學者跡接於道閭里有爭

訟不詣官而詣城決之李泌為相薦為諫議大夫

諫止裴延齡為相城力也

同上

按河間府志云城乃去滄州隱中條山滄州志云
隱中條山柳谷之北德宗時詔自滄州起之而新
舊唐書均無滄州之說似與本傳不合更考今天
津府屬滄州北三里有條山青縣南二里有中條
並不聞有中條山也舊志既誤合中山條山為一
而又於城傳增出滄州二字宜其承訛踵謬而不

五代

龍敏 字欲訥幽州永清人少仕州攝叅軍劉守

光亂避之寓居滄州遂客於梁敏素善馮道道為

唐莊宗從事乃潛往依之監軍張承業為道日聞

子有客可與俱來因辟敏監軍巡官使掌奏記

五代

史本傳

趙玉 漁陽人嘗客滄州依節度使呂充劉守光

破滄州盡滅充族子琦年十四玉竊負以逃變姓

名丐衣食以給琦琦仕南唐至兵部尚書燕趙間以玉能存孤翁然稱之續文獻通考

劉 昫 涿州歸義人為人美丰儀與其兄暄弟皞

皆以好學知名薊燕之間後為定州王處直觀察

判官處直為其子都所囚暄亦為怨家所殺昫乃

避之滄州唐莊宗即位拜昫太常博士以為翰林

學士明宗時遷端明殿學士兼判三司五代史

宋

家鉉翁 眉州人累官至僉書樞密院事宋末時使

元教授河間成宗即位賜還錫號處士有詠鯨川

八景詩滄州志

元

廖人俊 寧都人元初父死於寇母亦被掠人俊七

歲與祖父居既長誓求父骨得於叢塚間又至北

方求母聞在滄州至則已死欲負骨歸異父弟不

許遂刻母像而還合葬焉吳草廬集

明

卓 敬 浙江人徙滄州洪武戊辰進士歷任刑部

尚書洪武中諫諸王踰制又疏上建文言燕王智

勇絕人北平強幹之地宜徙南昌以絕禍萌靖難

後成祖欲大用中姚廣孝言夷三族

畿輔通志

何子壽

錦衣衛籍交城縣人已未進士任戶部主

事初為本倉監督歷任江西布政使司回籍僑居

天津

沈襄

浙江紹興人父鍊嘉靖中抗疏論嚴嵩之

奸謫遷保定州襄以拔貢歷任刑部郎中姚安知

府母老不仕遂告歸至天津資用乏絕留寓浹旬

吳維登

江南徽州人寓居天津以監生授鴻臚寺

序班

以上天津衛志

李浚

字長源上高人南皮令正華子隨任十年

才氣卓越領萬

戊午鄉薦重過南皮賦詩懷舊

流連浹日

南皮縣志

張彪

河南磁州人知慶雲縣寬猛相濟大得民

情秩滿以老乞歸而貧不能去遂占籍興濟家焉

鄒元標

字爾瞻吉水人萬

初進士歷官左都御

史加太子太保犯顏敢諫羣邪側目被謫時寓慶

雲天宮寺與僧壽平為方外交曾於殿壁題二教

歸一說至今翰墨如新

左懋第

號蘿石山東萊陽人南皮令之禎侄隨之

禎任居南皮登第後每過必低徊不忍去後以奉

使徇義著聞海內以上河間府志

張德政 字平子號侑盤武林人能詩善草書客遊

南皮遂卜居焉仕南通州州判卒於官列朝詩集小傳

孫文安 某縣人流寓鹽山力農養親父早死事母

姜極孝母歿既葬廬墓二年鹽山縣志

李思賢 江西南昌人賈於滄遂寓焉援例授光祿

寺署正滄州有貧不能葬者施棺瘞之每歲寒卽

施棉衣崇禎四年守禦百戶吳之屏監造盔甲違

式繫獄思賢為捐銀改造完官十三年大饑復捐

資千餘金賑濟全活饑民甚眾

周達仁 紹興人居滄行鹽占籍滄州崇禎十三年

饑捐資買米救活萬人遇公事輒代答者攤賠聞

有償還却不受鄉黨號為周義士壽七十一歲

陳 性 字益之浙江人籍於滄少事詩書博聞強

識為人有豪俠氣能急人難而無吝惜竭力事親

無懈志待兄弟姊妹曲盡手足之誼遇事急公倡

義常在人先考授府經歷

國朝

楊穎昌 遼東蓋州貢生任滄州分司捐俸修學親

督畚鍤居官清慎滄人德之陞乾州知州僑居於

滄州志

張文元 大同人寄籍天津順治十年天津被水

元捐貲賑荒全活災民以數萬計撫院上其事

詔賜八品頂帶以旌之子琦康熙七年亦出粟數百石

以食饑民

畿輔通志

陳錦 字天章遼東人由武進士歷任浙閩總督

錦少時曾隨父卜居青縣後過青泊舟河許延接

邑中士夫修縞紵之好青人稱之

蔡士英 字魁吾遼東人歷官總督文章經濟卓冠

一時士英幼讀書於青既貴往返過青多所捐施

以上青縣志

劉世燧 字本齋河南新蔡人南皮令址之父官陝

西鳳翔府知府有廉名乞休後址迎養南皮著有

倚雲閣詩集

南皮縣志

任度 字林屋本姓陳南通州人畫宗唐宋諸名

家遠邇徵索門限幾斷晚年悉以吳仲圭法應之

性崛強貧無儲粟未嘗以技自抑天啓中隱於滄

遂家焉

涂山 字青來號靜微南昌人寓於滄工詩能畫

草蟲花鳥俱入逸品沒後王中丞梅和公藏其遺

稿卜地葬之

張文亨 大同人僑居滄州性孝友有貸其財者不能償輒以原券歸之或以非禮相加笑不與較咸

稱長者

以上滄州志

張

霖

字汝作號魯菴永平撫寧縣人父明字遷

天津遂家焉霖幼岐嶷讀書十行俱下爲詩古文卓然成一家言由歲貢生起家歷官福建布政使司家饒於貲推解不倦中間緣事落職遂構問津園爲偃息地法書名畫充溢棟宇復招天下名流觴詠其中如梅定九朱竹垞姜西溟查夏重趙秋谷諸前輩咸主其家時人擬之月泉吟社玉山草堂差不愧云

牛射斗

字見垣山西長治人僑居天津順治間隨

洪經畧承疇督理軍餉授中書舍人後隨征江南多所擘畫次蕪湖卒於軍

佟

鉉

字蔗村已而道人其別號也長白人父某

官河南布政使兄弟六人皆通籍仕路鉉以國學生例授別駕不願謁選絕意華廡卜居天津城西門臨流水榜其居曰滄浪考槃布衣葛履忘爲貴介也性嗜山水耽吟咏早年詩學蘇陸一變而入

大貞元之室津之能詩者未有過之妾趙氏字
豔雪亦工詩鉉築豔雪樓貯之今土人所稱佟家
樓卽其遺址

程鑰 字北堅晚年更字果菴本浙江之山陰人
年十六來天津遂寓焉少孤事母以孝著與人居
不見喜愠之色於書無所不窺而淡泊不嗜榮利
有勉之就試者援筆立就辭采甚偉顧視隣生窘
甚袖以與之遂不試而出性倜儻好論當世事生
平游歷南北幾遍好施濟遇匱乏者雖旅邸傾囊
贈之無少惜從兄有無子者代之置姬侍親爲奉

養族弟有以子女托鑰者弟歿妻挾子女他適鑰
訟之年餘復攜歸爲之婚嫁盡禮容懷慶有以官
事致累者鑰爲左右之旣免密齋金餉鑰鑰峻拒
之不受客粵西友有挈妻子而病於逆旅者鑰爲
資給之凡數年以故家日益貧母卒於津謀歸葬
於越未得復遠客於浙客而病鑰自知醫診其脉
已絕泣而祝曰天苟假之年卒葬而死無憾也旣
而果不死奔走四方所得絲毫悉以供葬并置墓
田家人在北飢寒之書日至鑰盡焚之不以措意
蓋三年而葬畢而鑰亦竟卒於金陵矣友人謝重

可高其誼爲之經理喪事歸葬於越鑰勤於撰述
有斑管錄七十餘種豹隱齋詩文集若干卷無子
有女名德輝以節烈著

李釗 字所其號勉菴文安人也僑居天津性樸
訥與人交無纖毫苟且工鐵筆借以自養取酬視
貧富爲差等較量甚明其人爲所鄙雖有金不奏
力也喜談導養術年七十少壯以壽終

仙釋

周

長桑君 長桑君異人也嘗往來渤海館穀於秦越

人遂與靈劑飲以上池水能洞見人肺腑隔垣見

物療人諸疾隨手而應後莫知所終事詳史紀滄州

志

漢

白驪上人 不知姓氏自西方來滄州騎白驪衲衣

錫杖俗呼七祖見東塘蘆葦叅天多虎狼傷人以

錫杖指示驅走無跡民得安生立堂以祀後亦不

知所之河間府志

按河間府志及滄州志並云上人俗呼七祖則爲齊梁後人無疑矣列之漢代不知何據也不敢臆斷仍之以質博雅

晉

鮑靚 字太元東海人年五歲語父母曰本是曲

陽李家兒九歲墜井死其父母尋訪得李氏推問

皆符驗靚學兼內外明天文河洛書稍遷南陽中

都尉為南海太守嘗行部入海遇風飢甚取白石

煮食之以自濟王機時為廣州刺史入廳見二人

着烏衣與機相捍良久擒之得二物似烏鴨靚曰

此物不祥機焚之遂飛上天機尋謔死靚嘗見仙

人陰君授道訣百餘歲卒

晉書本傳

石垣 字洪孫自云北海劇人居無定所不娶妻

妾不營產業食不求美衣必麤弊或有遺其衣服

受而施人人有喪葬輒杖策弔之路無遠近時有

寒暑必在其中或同日共時咸皆見焉又能闇中

取物如晝無差姚萇之亂莫知所終

晉書本傳

按河間府志及滄州志以垣為漢人又以垣為垣俱誤

唐

呂洞賓 開元中一道士自號彭蠡主人索滄酒千

餘斗飲竟乘鶴而去後人構樓肖像以奉之樓名

朗吟 滄州志

李清 北海人隋開皇四年入雲門山窟遇仙授

書一軸甫旬歸已為唐永徽元年矣開所授書乃小兒醫方也屢試屢驗後入太行不見神仙通鑑

李長者 自滄州來日食十棗一栢葉小餅掩室著

論無虛時後逢一虎長者語虎曰吾欲釋華嚴經可與吾擇一棲止處虎遂起行至神福山得一龕

居之乃著論年九十六化於龕中列仙傳

陳鉉裝 父光蕊登進士隋時除守無棣渡津被水

賊劉洪害裝在襦襖母殷氏倉卒間以木匣貯之

置於河中流分水鎮西河孺金山寺僧人驚啓視

之有字一行在衣襟知其本源丐河南岸康母乳

之稱海流和尚貞觀十三年奉勅取經天竺賜號

三藏去師郭外農談

宋

劉德仁 鹽山人始生有光照其室及長讀書稍通

大義會靖康之亂居本邑太平鄉一日晨起有老

叟乘犢車相遇撫道德經要言授之曰善識之可

以修身可以化人仍投筆一枝而去自是元學頓

進從遊者衆德仁乃取所授書敷釋其義以示人

一曰視物猶已勿萌戕害凶嗔之心二曰忠於君

孝於親誠於人辭無綺語口無惡聲三曰除邪淫

守清淨四曰遠勢利安貧賤力耕而食量六為用
 五曰勿事博奕毋習盜竊六曰勿飲酒茹葷衣食
 取足勿為驕盈七曰虛心而弱志和光而同塵八
 曰毋恃強梁謙尊而光九曰知足不辱知止不恥
 學者宜世守之金大定初詔居京城天長觀賜號
 東岳真人傳其道幾徧國中且善於劾召之術趙
 氏為狐所崇德仁劾之里中瑩兆自焚狐數百鳴
 嘯赴火死人共神之後追封無憂普濟開明洞微

真人 鹽山縣志

元

海上老人 隱姓氏住渤海條山洞中時與山左右
 耆老相遊息遇金亂年荒饑死者眾耆老憂切不
 釋老人曰從吾入海以度儉年入海煮石而食甚
 甘美次年諸老皆肥澤而歸 畿輔通志

明

董教清 號中壺羽士也初修煉於太和山之五龍
 宮久之欲遊覽諸名勝遂涉荆襄歷秦晉蜀趙間
 得異人傳以醫藥濟世南皮有安姓者助資施藥
 仍留居之遠近咸稱國手年九十餘終 河間府志

洪秀 號天竺僧住慶雲天宮寺戒律精嚴兼工

於詩有句云蒲團靜坐千山月竹戶閒棲一片雲
名流爭賞之

壽平 住天宮寺為洪秀繼席貌奇異目如指摺
痕時稱小眼法師博覽內典識叅上乘與鄒爾瞻
為方外交著有三教歸一論

蓮峰 道士年百餘歲不知何處人步履如飛訪
慶雲張某水部於北村不值題詩東嶽廟壁云一
別北村經幾年桑田成海海成田浮雲世事翻新
故流水韶華趁後先一帶好山荒樹外數聲啼鳥
落花前我來訪舊渾無識大半人非更可憐以上慶雲

縣志

一舟 名芥長蘆人工畫山水人物皇明書畫史

國朝

海鑑 字幻持一字者休鹽山歸寧里人年十六

欲出家母牽裾止之鑑曰有弟在母無患失養也
拜母而出投師沙門誦習金剛楞嚴諸經務究大
義不屑耳口久能通曉坐卧只以繩牀自隨歷叅
五臺少林落伽諸尊宿後入黃山精研韻學五音
清濁高下毫髮必辨順治初歸里探母邑人得傳

其學至今稱之鹽山縣志

王聰 字玉笈號野鶴傍三叉河之濱結宇曰香

林苑極幽潔老樹古藤野花碎石錯雜窻戶間工

於詩詩人過者屐滿戶外週遭廊廡長箋短幅粘

壁無隙地或戲謂其齋曰詩廠

海光寺志

元弘 字石庭會稽人姓姚氏孝子諱崇明者弘六

世祖也母嚴夢服金伽衣僧而娠十七祝髮大善

寺為盟石息法嗣越七年遍叅諸方熟精內典若

為則範寒泉晝諸耆臘皆自為弗及也康熙庚辰

孝子墓為勢家所占弘杖錫上長安力謀復之

安郡王及弟紅蘭主人一見如夙契延主彌陀寺

席霽嶮永法師薦入

內庭

召對暢春園賦初春瑞雪應制詩稱

旨丁亥掛瓢天津之海光與湘南衡鍵關結夏箋疏楞

嚴全部已酉

聖祖南巡召對杭州之西湖行宮

賜御書金字心經 精於書畫尤工詩禪藻清芬凌轢

島可尋以不樂塵空歸老高雲晚著杜鵑集又號

杜鵑和尚云

成衡 字湘南嘉興錢氏子幼耽禪悅薙染後力叅

上乘康熙丙戌天津總兵監理建普陀寺於城南
延衡爲主席己亥衡迎謁

聖祖於西定

賜御書海光寺額續復三

賜紫衣恩賚甚渥衡書畫俱入逸品生平所作詩不下
數千首絕類大蘇又輯有海光寺志八卷晚歸天
童以終

按流寓仙釋雖不產自本郡而緝地輿者若少陵
浣花村東坡雪堂每錄之以爲美譚矧讌友之臺
鯨川之詠俱在郡壤地因人重寓公之宜志也舊
矣至緇羽名流魏晉以還並載正史爰憮其軼事
以附諸傳之末以上人物合十三門載籍闕如蒐
羅未廣拾遺補漏實有望於後賢云

天津府志卷之二十九 終

天津府志卷之三十

列女

郡邑之志肇於陳畱梓潼汝南漢中諸傳記其中
 紀載往往士女各半天之生材固不徒厚冠裳薄
 巾幗也班孟堅志地理謂燕地承太子丹餘風男
 女類不以廉耻自勵今考之故典籍之傳聞驗之
 坊表奇節偉烈簡不絕書抑何古今遼闊相去若
 是之懸絕耶矧淹沒不彰者又不知凡幾耶志列

女

天津縣

明

楊氏 指揮倪旺妻年十九旺故守節無玷六十八

歲卒 河間府志

劉氏 指揮楊潤妻二十而寡子檜方一歲事姑以

孝教子有方年六十四卒 以下天津衛志

佟氏 指揮紀銳妻年二十二銳故氏守節素服終

身卒年五十二

王氏 副千戶張翔妻二十三而孀居無舅姑伯叔

教孤子以賢見稱

按張翔河間府志作孫翔

唐氏 千戶孫佑妻佑卒氏年三十悲痛不食月餘

而死 河間府志

王氏 何昌妻年二十昌故有求配者氏引刀破面

誓死不變年八十六卒 畿輔通志

王氏 孫恕妻年十八恕故無子事姑孝姑死殯葬

如禮年五十九卒 河間府志

倪氏 謝芳妻年二十四芳故事姑撫子克盡慈孝

年七十五卒 以下畿輔通志

朱氏 馮綸妻年十九而寡撫幼子瀾成立瀾娶康

氏年二十三而瀾又卒婦姑凜節各八十餘歲而

終

章氏 李天秩妻秩故氏年二十七父母欲奪其志斷髮不從孝養舅姑姑死哀痛成疾而死

蔣氏 張和妻年二十七和故撫孤食貧人服其節七十歲卒 以下天 津衛志

吳氏 天津衛左所總旗李實妻年三十五實故撫孤無玷七十五歲卒

宋氏 孫能妻年二十七能故氏守服三年不出閨門哀毀踰禮一日除服畢卽以是日閉門飲毒自盡眾皆哀之卒年三十歲

鍾氏 天津右衛前所副千戶徐榮妻年二十七歲榮故子綱三歲家貧以耕織為事守節無玷年八

十八歲 畿輔通志

李氏 天津衛指揮使倪通繼妻理家不私業成悉以歸前妻子雄祀先必齋戒待親族妾媵皆有恩

以下天 津衛志

楊氏 都指揮僉事呂巖繼妻撫前子昂三歲如已出婚娶以時人以慈母稱之

賈氏 生員李栢妻年二十四栢故氏撫孤無玷卒年六十五歲

佟氏 天津衛百戶馬馭貴妻年二十七歲貴故氏撫孤成立卒年六十歲有司給扁以旌畿輔通志

杜氏 天津左衛正千戶盧鴛鳴妻年二十六鴛鳴歿於王事氏撫四歲遺孤邦靖守志不渝撫按學

三院旌曰貞節可風年六十六歲終天津衛志

國朝

朱氏 生員馮鼎錫妻年二十七歲鼎故撫幼孤三人教之成立茹苦食貧冰操四十六年順治十四

年建坊 旌表卒年七十三天津衛志

宋文元女 鄰人傅良臣等盜劫入室被執逼姦不

從與祖母劉氏同被勒死康熙二十三年 旌表

宮氏 邢國琦妻年二十三夫亡守節至六十四歲康熙四十四年 旌表

曹氏 王國士妻國士無行利豪棍馬榛多金逼妻與榛苟合氏羞憤痛哭潛將幼子勒死遂自投水

死榛與國士俱照律擬罪氏於康熙四十九年旌表

汪氏 韓韶妻年二十四夫亡針指自給守節四十八年康熙五十三年 旌表

邢氏 李雋妻雋亡孝事翁姑撫孤成立守節四十

六年康熙五十三年 旌表

郎氏 劉慎繼妻慎官守備歿於閩氏年二十四攜

子扶襯歸里時翁姑柩亦未葬氏竭力經營三喪

並舉守節五十一年康熙五十四年 旌表

張氏 張大妻為馮起龍姦逼殺死康熙五十七年

旌表

龐氏 于允科妻氏年二十七夫亡翁姑亦歿典鬻

粧資埋葬兩世守節四十五年雍正三年 旌表

陳氏 張庚錫妻惡少李大膽逼姦不從被殺死

正三年 旌表

徐氏 太學生沈繼元妻年二十繼元歿食貧勵節

勤紡績以事舅姑舅姑歿喪葬盡禮遠近稱之無

子繼姪世英為嗣教育成立克振家聲苦節四十

四年雍正四年 旌表

李氏 張國紀妻夫亡守節三十五年撫孤入泮雍

正四年 旌表

申氏 張廷宣妻夫亡苦節三十八年撫孤成立雍

正四年 旌表

婁氏 張鳳鳴妻夫亡孝事翁姑守節三十七年雍

正四年 旌表

李氏 王馨芝妻夫亡遺子甫三月氏剪髮矢志孝事翁姑守節三十六年雍正五年 旌表

張氏 邢大成妻夫亡孝事翁姑矢志守節三十六年雍正五年 旌表

沈氏 林遷妻夫亡孝事翁姑甘旨無缺守節四十四年雍正五年 旌表

魯氏 武廷豫妻夫亡守節四十四年人稱其節比公筠雍正五年 旌表

胡氏 王士英妻夫亡絕粒毀容志在殉夫翁姑阻之撫孤成立守節四十六年雍正五年 旌表

李氏 劉機妻夫亡矢志守節四十二年雍正五年 旌表

周氏 王克家妻夫亡孝親撫孤守節二十六年雍正五年 旌表

王氏 張濤妻夫亡堅守苦節三十六年雍正五年 旌表

于氏 王極妻夫亡親老子幼仰事俯育守節三十三年雍正五年 旌表

穆氏 俞天覆妻夫亡紡績奉親甘旨不缺守節四十九年雍正五年 旌表

林氏 張峒詹妻夫亡孝事翁姑勤於紡績守節四十年雍正八年 旌表

靳氏 張媚詹妻夫亡無子善事孀姑守節三十九年雍正八年 旌表

王氏 李天生妻氏年十九夫亡孝事孀姑守節五十年雍正八年 旌表

鄧氏 鴻臚寺序班王應祥妻年二十七夫亡典賣衣飾經營喪葬奉事舅姑甘旨無缺訓課子孫俱能成立苦節五十餘年雍正十一年 旌表

同邑金相

有傳

白氏 靳廷檜妻年十八夫亡無子養姑盡孝勤女工以供甘旨守節四十八年雍正十一年 旌表

陳氏 靳乾健妻年二十三夫亡奉養孀姑撫踰月子成立娶媳子又早卒遺孫甫週復為撫養成成立守節三十三年雍正十一年 旌表

張氏 李萃妻年二十九夫亡鬻衣飾以營喪葬撫懷抱孤子親為課誦訓誨成立苦節歷四十年雍正十一年 旌表

王氏 孔行祚妻年二十八夫亡奉事翁姑克盡婦道及歿喪葬如禮教子撫姪皆能成立守節二十

年雍正十二年 旌表

任氏 符鍾奇妻年二十夫亡舅姑繼歿獨力經營

喪葬咸稱盡禮秉持家政內外肅然守節二十年

卒雍正十二年 旌表

按自宋文元女而下三十二人不以各氏存亡為次而以旌表年代為次者遵國典也其傳並見畿輔通志故不分注餘州縣倣此

王氏 生員趙連璧妻璧亡氏年二十九無子家貧

姑老氏堅貞自矢撫姪之符為嗣紡績奉姑篝燈

課子苦節四十年之符成進士 贈孺人乾隆二

年 旌表 以下公舉事實冊

石氏 主簿趙完璧妻年二十五夫亡姑老子幼家

貧事姑鞠子備極艱辛子之篆之錄俱成庠生卒

年六十六 乾隆二年 旌表

趙氏 趙都妻年二十四都没以死自誓遺子之範

甫五歲氏忍死鞠育辛勤課訓卒獲成立冰操四

十年如一日 乾隆二年 旌表

宋氏 許敬祖妻夫亡氏年二十二守節三十五年

事舅極孝舅歿喪葬盡禮撫子有成 乾隆三年

旌表

馮氏 生員張延詡妻年二十五詡故茹冰守志教

子成立撫院王登聯給扁獎勵曰皦節垂昆卒年

六十四 以下天津衛志

李氏 宋廷桂妻年二十八桂故水霜苦守撫孤成

名

戴氏 監生汪美妻年二十八歲美故水操撫孤四

十二年七十歲全節而終

劉氏 米希榮妻希榮貌陋家貧父母欲奪其嫁氏

年十四誓死不從卒歸於米天津巡撫夏玉旌其

門曰冲年賢德

李氏 生員汪烜妻年二十一歲烜故撫養二孤苦

節四十三年六十五歲終

陳氏 孫克開妻年二十五歲舅歿姑孀即伴姑寢

二十九載夫先姑歿禮葬二喪撫育二孤成立鄉

閭稱為孝婦

陳氏 張朝樞妻年二十歲朝樞故甘貧守志撫孤

成立六十六歲終

柳氏 張棟妻年二十五歲棟故茹貧守節撫孤三

人孝養老姑天津副使梁應元扁獎天壽懿貞年

八十歲終

王氏 生員邢昌言妻年二十一歲昌言故無子撫

養二女水操彌堅

楊氏 生員楊篤慶妻年二十二歲篤慶故撫一週

孤子甘貧守節

韓氏 生員陳所養妻年二十二歲所養故貧苦撫

孤孀操五十四年七十六歲終

宣氏 生員劉慶宏妻年二十二歲慶宏故霜操不

替六十三歲全節而終

林氏 吳應賓妻年二十七歲應賓故無子苦守孤

女出嫁始終完節六十九歲終

河間府志

蔣氏 生員孟宗伊妻年二十二歲宗伊故父母

其少令改適氏矢志守節撫養二子並得成立

天津衛志

王氏 楊懋禧妻年二十九歲懋禧故矢志守節撫

孤成立卒年八十餘

丁氏 陸暉妻年二十五歲暉故撫育三孤節凜霜

筠天津清軍同知章國佐給扁獎曰名淑完操

李氏 趙應貞妻年二十四歲應貞故上孝衰姑歿

加厚葬下撫八月遺孤成立守節四十四年艱苦

倍常始終不改其操

呂氏 守備張夢周妻年二十九歲夢周故子幼家

寒霜操終始如一守節五十八年八十七歲終

一馮氏 生員張英妻年二十歲英故並無子女茹貧

食苦侍養孀姑三十餘年無倦節而且孝闔邑稱

之

孫氏 生員王思哲妻年二十八歲思哲故居鄉兩

遭兵火矢志不改七十九歲全節而終

河間府志

董氏 生員沈可成妻年二十七歲可成故守節撫

孤克全冰操

以下天津衛志

王氏 姜萬捷妻年二十二歲萬捷故不兩月翁姑

繼歿矢志撫孤貞節無愧

劉氏 辛念恒妻年二十四歲念恒故遺孤三歲苦

荼撫孤守節無玷

李氏 武進士任京營守備漆生色妻年二十八生

色故苦節以終

何氏 生員倪光國妻年二十八光國故撫孤守節

五十九歲終

張氏 戶部主事母槐慶妻年二十九歲槐慶故撫

孤勵操以賢見稱

靳氏 生員母光瑜妻年二十八歲光瑜故貞志苦

守孝事孀姑

劉氏 姜承美妻年二十九歲承美故家貧苦志全節而終

楊氏 生員張書紳妻年二十七歲書紳故撫孤貧苦守七十三歲而終

謝氏 倪光榮妻光榮故無嗣苦守完節

周氏 生員張汝弼妻年二十六歲汝弼故家寒守節撫孤苦志二十五年五十一歲終

于氏 生員李先登妻年二十七歲先登故撫孤守節二十四年五十一歲終

靳氏 秦守安妻年二十九歲守安故甘貧守節撫子成立八十一歲終

劉氏 詹金妻年二十六歲金故撫孤守節五十八歲終

按畿輔通志作衛詹金誤

羅氏 生員于滋妻年二十九歲滋故守節撫孤始終不替

朱氏 韓再捷妻年二十四歲再捷故守節撫孤貞操不替有司給扁旌之

穆氏 湯橋妻夫亡守節養姑訓子艱苦備嘗姑歿哭之喪明不數月亦卒

胡氏 馬永堅妻夫亡撫孤成立守節終身以下畿輔通志

陳氏 胡點妻夫亡守志不渝撫孤成立

楊氏 汪文紀妻於歸一載文紀歿氏年二十八次

志撫孤不以饑寒改節今八十二歲以下公舉事實冊

鄭氏 汪文銳繼妻氏年二十七夫故栢舟自誓卒

撫二子成立守節四十七年

吉氏 于邦翰妻年二十二歸邦翰三年夫亡誓不

再適歷今守節五十四年

李氏 張國臣妻夫亡氏年二十六矢志靡他有奪

其志者峻拒之撫一子成立今八十六歲

李氏 張鑄妻生員李沂女十五歸鑄二十九而寡

孝事舅姑撫孤成立

李氏 河間生員李尙蔡女二十適倪世貴世貴亡

氏年二十六毀容自誓守節三十四年足不踰閭

外

王氏 張我實妻氏年二十七我實故撫育遺孤永

操自勵

張氏 耿全德妻年二十四而寡無子繼族姪為嗣

家極貧女紅所入營葬三喪人以爲難

張氏 王銘新妻二十一歲夫亡鞠育遺孤守志不

變兩事繼姑備盡婦道今六十二歲

嚴氏 生員于起泮妻夫亡氏年二十七時孀姑病瘖不能言氏先意伺之婦兼子職無毫髮忤撫子入庠鄉閭賢之

陸氏 生員于宗文妻十八歸宗文逾十年而寡孝事舅姑撫子入庠守節四十一年艱辛備歷今六十九歲

侯氏 太醫院張恂繼妻恂亡氏年二十六家極貧盡鬻奩具以襄大事孝姑教子白首全貞

蕭氏 生員孫天職妻十七歸孫夫亡氏年二十八歲事舅孝養備至繼姪昌爲嗣補諸生今六十三歲苦節三十六年

彭氏 劉邦琪妻二十五歲稱未亡人舅姑年髦氏生事死葬竭誠盡禮人無閒言繼姪耀祖爲嗣苦節歷今三十九年

劉氏 浙江山陰人僑居天津少有淑德年十九爲同邑胡利溥妻利溥慕松喬之術遠游不返時劉氏年二十力作養舅姑長齋終身有遺腹子名忠禎親撫成立及長命之遍訪四方備極艱險終不得卒年七十四苦節五十五年孫睿烈天津諸生

譚烈婦

湖廣陳氏女生而娟秀靜好與凡女異長

適蘇州譚應宸爲故江西巡撫安某紀綱之僕巡撫罷官卜居天津氏夫婦從焉家本舊姓執婦道愈恭壬申夏六月應宸卒於疾氏涕泣哀甚以死自矢人且疑其誕越三日視夫殮畢乃搜篋笥得夫所遺三百餘金上之主夫人僅持一錠畱付尼師俾誦蓮華經以消宿業復舉簪珥之屬散給同輩泣拜夫人刻期自殉夫人始大駭異再四慰畱曰我孀居久汝其伴我我視汝如女汝其無死氏長跽再拜曰夫人休矣妾方少艾苟不瞑目其何以報良人得早就木妾之幸也夫人休矣妾從此辭衆知志不可奪遂告諸當事當事遣吏慰解氏默不應旣而慷慨自言王者以節義風勵天下亦良有司之責也而顧諭妾以不死耶妾志決矣無多言吏錯愕謝去夫人痛氏不果畱爲張棚道左促具黃腸日視髹漆衣履首面之飾纖悉皆備更列殺核羅酒醴如祖行客蓋氏不食已三日矣至是始御匕箸言笑自若無異平日上而夫人下及儕輩握手欷歔泣數行下勿顧也酒三行曰可以死矣乃自經時觀者如堵臨穴之頃會葬者以千

許威嘖嘖稱烈婦不置云

諸氏 阮奇玉妻夫死無子營殮畢自縊以殉

求氏 趙某妾年十九夫亡家赤貧氏撫遺孤紡績

以供饘粥守志不渝歷十六年如一日鄉人哀之

丁氏 天津民金振妻也振本籍浙江之山陰寓天

津久遂家焉以授徒爲業常匱乏丁氏以女紅助

之使振無內顧憂蓬戶湫隘每進食必以禮閨門

之中儼若朝典振無子丁撫繼女如已女屢勸振

置媵妾振不應丁密以婢徐氏納焉生二女撫愛

益甚然卒無子乾隆元年夏振被羸疾百計禳療

不效八月振沒晝夜號泣不絕聲是時外無強近

親族內無尺帛斗粟解衣鬻器始克襄事事畢卽

不食妾與繼女力勸進食丁素待女慈重違其意

勉進醯粥數勺久之殉志益烈夜半伺妾女俱寢

卽就柩前長跽自縊貧不克殯郡縣爲捐資以葬

時年三十八歲格於例勿獲旌郡人咸哀之爲立

碑紀其事附葬於陳氏諸氏裘氏三烈婦墓土人

稱四烈云

趙氏 揚州人平樂府知府佟鍊妻封恭人幼聰慧

六歲卽解吟詠祖學使爾玉及父孝廉某皆愛憐

之甫筭歸鑌鑌起家曲周令旋調富川治行第一
擢平樂守服官勤慎氏內助居多鑌卒於官氏年
二十六扶櫬還葬京師依兄公鉉傳詳寓賢僑居天津
撫諸孤督課不輟生平作詩最富不輕示人其祭
竈詩云再拜東厨司命神聊將清水餞行尊年年
破屋多塵土須怨夫亡子幼人又題邊塞圖云黃
沙漠漠迥無垠萬古關河不度春今見畫圖腸欲
斷可知當日戍邊人二絕為世傳誦晚號殘夢主
人子四濬乾隆丙辰進士

金氏 名至元字含英河間府學生金大中女適天

津查氏夙嫻內則不苟訾笑性極孝事父母及舅
姑皆得其懽幼讀書通大義穎慧絕人女紅之外
書算琴管無不精妙入神尤工於詩著有芸書閣
集二卷清拔孤秀不染粉黛習氣平素闕不示人
既歿世爭訟之濟南趙宮贊執信為序以傳陳鵬年撰

金夫人傳畧

李孝女 名芝圃字卓菴處士友泰女也幼穎悟通
孝經列女傳母涂名巒字烟玉精繪事女得其傳
尤工寫大士像性至孝不忍違親矢志終身不字
女紅所入佐甘脆焉母病侍藥餌日不承睫顙天

減算以益母壽迨沒痛不欲生父患疽女口舐所患者四旬疾賴以除五十四歲卒彌留時以二親未葬囑弟讓殮以白衣君子嘉其知禮

張孝婦 順天府學生員蘇媚女天津處士張倫妻

也婦幼習書傳通大義言動皆合矩矱十九歸倫倫母病婦侍牀簣惟謹迨歿居喪盡禮時倫有弱弟一女弟二甫鬢齟婦鞠育教誨不辭勤瘁兄公

析產異居家計中落婦事舅黽勉有無務得堂上

勸先是婦嫁時資送極豐二小姑嫁婦均所有以

昇之奩篋一空舅七十病篤昏瞶中頻呼孝婦婦

計無所出循堦而號禱於天割左臂肉徑寸毫羹

以進舅啜之竟甦遠近咸以孝婦呼之 孫勣撰張孝婦傳

張氏 孟起鳳妻二十九而寡無子食貧苦節歷今

三十年始終不渝

程烈婦 名德輝鑰女也幼沉敏讀書一一過輒成

誦嘗取殘燭藏之以佐夜讀長江詩性謹密不以

示人隨父客懷慶得故人子孫弘天津人也妻之

初婚之夜夢吟梨花空自落之句意以為不祥久

之泓客夷門歲或一二返返則相對一室往復今

古雖嚴師友不過也已而泓病病遂沒無子程氏

以死自誓旋因繼嗣未立復強起泓之未沒也與
 程氏依父居常在懷慶至是以舅在津宜奉養遂
 返津焉朝夕進甘旨無不先意承志綱紀家政咸
 有禮法鄉黨翕然稱之泓沒六年弟明生子曰紹
 賢程氏以為已子越明年程氏夢泓來迎遂作書
 告舅自明從死之志闔戶自縊卒年三十三歲卒
 之夕有白氣起於室中赤鳥翔於戶內生平作詩
 甚多卒前一日盡焚之存者雨霽幽蘭等數首而
 已

馮氏 張我德妻十七歲適我德二十七而寡今六
 十四歲

陶烈婦 姓陳氏天津陶某妻也於歸三年陶以疾
 卒氏引刀自殉天津道石天樞旌其閭曰鵲血流
 香

王氏 閻世英妻年二十四而寡鞠二幼子成立苦
 節四十三年今六十八歲

孫氏 詹嶽妻二十二適嶽逾年嶽歿子源長始三
 月四歲失明氏勤針紉撫之乾隆元年沒守節四
 十一年

周氏 天津甲族祀忠義祠諱天命傳詳忠臣者其叔父

也年二十歸同里姜皓越八歲而寡五十五載以終方皓之歿也遺子起渭起濱在抱氏撫以成立甘苦備嘗孫五人模諸生森雍正乙卯科舉人

夏撰姜節母小傳

郭氏 楊文妻二十而寡遺孤甫六月舅姑年髦氏

仰事俯育備嘗辛苦舅姑歿喪葬盡禮文側室出也庶姑素不悅氏及是晝夜虐使之迫其改節然後已氏飲泣委庶姑於夫弟而攜其子之母家織紡以為衣食卒全其操庶姑歿厚葬之卒年七十

三 朱紹夏撰楊節母傳

李氏 文院編修嘉賓女歲貢生牛奩妻二十四

歲奩亡撫遺孤鍾瑞克底成立没年五十一方氏之病痿不起也子婦張氏侍奉晝夜不去然簣手除糞穢久無倦色戚里間咸以賢孝稱之

郭氏 河南懷慶府知府張釗妾康熙五十三年釗

卒於任氏年二十四守節不渝歷今二十五年如一日

趙氏 州同王言妻十九歸言逾三載而寡絕食以

殉舅姑勉以撫孤始進勺水事舅姑極孝苦節十一年死

田氏 王之臣妻年二十三歸王舅姑皆早世元配
 尹氏遺一女甫三歲義子居仁五歲氏閔育之越
 三年生子統又二年之臣物故氏哀號欲從死親
 屬勉以存孤乃強活非其本心也有族子德化利
 其產與姑謀奪氏節氏曲意下之結以賄德化與
 姑感愧而止後居仁亡氏命統為卜葬地統問故
 氏曰居仁自有家世若葬之先塋恐亂汝宗以女
 嫁故千戶梅松年之曾孫芳即前尹氏之遺孤也
 資遣特厚年五十七卒計其守義始終蓋三十年

云 朱紹夏撰王節母傳畧

王氏 魏星士妻二十八歲而寡家貧無子女籍縫
 紉以存活苦節五十六年而沒

靳氏 劉玫妻玫沒氏年十九事孀姑以孝稱苦節
 二十九年

李氏 章紹學妻年二十九而寡撫遺孤廷選成立
 今六十五歲苦節三十六年

天津府志卷之三十 終

